

Der ander Theil heist in sich Regulam de tribus numeris. Inn ganz vnd gebrochenen Zahlen / sampt andern dero gleichmässigen Regeln.

Was ist Regula Detri?

Von den Welschen wirds genant Detri / vnd heist von dreyen Zahlen / so in jedem Kauff vermeldet werden.

Hat auch sonsten andere Namen / als regula aurea, mercatorum, proportionum : &c.

Wie macht man solcher Regul Exempel?

Also: Setz die Frag allezeit zur rechten Hand / vnd das / so mit demselben gleichen Namen hat / forne zur Lincken / was aber ein anders ding bedeut (der Werth genant) in die mitte / dann Multiplicire / das mittel vnd hindere bey der rechten / das Product dividire ins fördere bey der lincken Hand / Was darauß entspringt / das ist dem in der mitteln stell am Namen gleich / vnd heist das Facit / oder bericht deiner Frag.

Als einer hat ein stück Tuch / das heist 36. Eln / verkauffe das / vnd gibt 3. Eln vmb 5. fl. Wiltu wissen / wieviel er Belts löse? So machs also: Setz auff die Regul hinten zur rechten Hand die 36. Eln / als die Frag / vnd forne zur Lincken / das / so deme am Namen gleich ist / Nemblich 3. Eln / mitten aber den werth / als die 5. fl. Nun Multiplicir die hindere vnd mitlere statt mit einander / Nemblich 4. mit 36. kommen 180. das Dividir ins fördere / das ist 3. kompt 60. fl. Das ist dein Facit / das ist / soviel Belts hat er gelöst / vnd stehet also:

Eln